

S' i na pieis una paria,  
 A l'è infalibil ch' i saria  
 Senza riva e senza fond.  
 S' i ciapéis bin grossa dota,  
 Ma ch' a fuss una bigota,  
 I faria un gram giornal;  
 Couste si son d' una rassa,  
 Ch' a s' fan vede sante an piassa,  
 E peui son teste d' paramal.  
 A saria cosa dura  
 S' a m' tocheissa pr sventura  
 Una fomna desbaucià,  
 Com' pur trop ai na j' è tante,  
 Ch' a s' figuro esse galante.  
 Ma fan mila pastrocià  
 E s' i capiteis quaich loira,  
 O servel da davanoira,  
 Com' avrijne mai da fè?  
 L'è innegabil ch' a m' faria  
 Consumè tut lo ch' j' avria,  
 E peui forse ancor cherpè.  
 Ma mi veui furni sta landa,  
 Nen savend pi da qual banda  
 Trovè coula ch' a m' conven;  
 I concludo, e peui i taso,  
 E mandrai a fè da l' aso  
 Le fumele e chi ij sosten.

### Le Figlie da maritare.

#### CANZONE LI.

Scotè bin voi aitre fic,  
 Ch' ij sè tant acalorà,  
 Ch' a s' peul disse ch' j' aviscrie

Le motere an mes dij prà;  
 Ch'a s'peul disse ch'j'aviscrie  
 Le motere an mes dij prà.  
 A cogeve ant quaich bialera  
 D'un mulin o d'un bator,  
 A sarà la mei manera  
 Pr calmeve coul calor.  
 Fora apenna dant la greuja,  
 I comense furniolè,  
 Peui a v' sauta dlongh la veuja  
 D'esse spose al carlevè.  
 E da già ch' i sè tant ardie,  
 A sarìa mei pensà  
 Ch' i v' arvolteisse an mes j' urtie  
 Quaich matin su la rosà.  
 Pr smiè peui bele, i v' onse 'l plagi  
 Del mostas, del col e man,  
 Ma saria manch darmagi  
 S' i dovreisse d' sira d' gran.  
 Quand ij sè peui già grandètte,  
 E giamai da maridé,  
 I fè dlongh le bernufiètte  
 Pr podeive fè stimè.  
 A le feste pr tifeve  
 I ste mesa la matin,  
 Ma loli l' è tut pr feve  
 . Marcè apres tuit i gridlin.  
 Peui a v' ciapo an brassèta  
 Pr mneve un poch a spas,  
 E conteve quaich barslèta  
 Ampastà tra maire e gras.  
 E voi i rie com' d' folasse  
 An scotand coule rason,  
 Tant ch' i slarghe le ganasse,  
 Ch' ai podria intrè un micon.

La pi part d' voi aitre inclinne  
 Mach a robe d' vanità,  
 Cousta a l' è (povre doninne!)  
 Tuta la vostra santità.  
 J' avi 'l veso squasi tute,  
 E 'l servel fora da post;  
 D' esse bele, o esse brute.  
 I sè tante scûme d' rost.  
 Gioventù, dnans piè ste fie,  
 Pensè bin a lo ch' i fè:  
 Seve nen ch' a son granghie,  
 O sia ronse da brusè?

### Le Mode.

### CANZONE LII.

**O**h quante mode baravantane,  
 Ch' a va inventand la vanità!  
 Ai passa pochi meis o smane  
 Ch' un veda nen quaich novità;  
 Che smargiassade,  
 Che arlichinade  
 Tant strambalà ch' a fan sturdi;  
 Oh le mode, malan a le mode,  
 E quand vorranne mai furni?  
**I** n' eu vedune già tante e tante,  
 Ch' a j' è pa meud d' tnie a ment;  
 La pi part son gent galante,  
 Ch' a l' an la testa pienna d' vent;  
 Le persone sode  
 A stan pa a le mode,  
 Ansi ai peulo pa sufri.  
 Oh le mode, ecc.